

## Leev Tante Finchen

sit längere Ziet jonnt mech he en onserem schöne Hassels e Huus on däm sin Ensasse schwer op de Nerve, on zwar dat wisse Pappkatonghuus met blaue Balkönsches - Bublitzer Stroß/Eck am Köhnen. Do trecke sit e paar Johr' Männekes on Wiewkes fast täschlich en on us. Anfangs wore de Meede för de kleene Kabüffkes zo dür - jetz deht wohl och dat Sozialamt Lütt erenn on die hant för mech all ne Dachschaade. Do jröle Besoffene, et klöppe sech rejelmässisch de Bewohner, laut dröhnende Musik - met Vörlev Sondachs - von Techno över orientalische on afrikanische Musik bes hin zo Marschmusik es alles vertrade. Dat Ömfeld von dem Huus süht och us wie Sau. Ech ben gespannt, wie lang' dat noch esu jehet.



Wat angeres, dinn Schötze send am Fastelowendssonndach em Hasseler Veedelszoch metjenge. Do hant die endlich emol ehr wohr Jesecht jezeichnet - „Alles Düwel“! Äwwer die wore met de jrösste Foosropp on hant janz doll uusjesenn. Einije han ech kohm jekannt, för allem dä Oberst, de soh jo uus, wie dem Düwel se Jroßmutter. On jeworfe hant die in Hassels, för allem de Jongens von de Schölerschötze, ech han manchmol jedacht, die hätte 4 Häng, sovell hant die jeschmesse! Ech kann mech nit vörstelle, dat die en Riesholz op de Henkelstroß an de Tribün noch jet zo schmisse hatte. Ech hoff jo, de Kenger hant och an de Hassler Zangärzt jedacht, on hant sech selver och jet von dem ville Sößkrom en de Täsch jesteckt.

So e paar Intelligenzbestie bei de Stadt könne sech mol wedder för hervorrarende Jehirmakrobatik jejenseitisch op de Scholder kloppe. Met erstaunlicher Präzision es et denne jelonge, ne Börjersteischschneitt von de Hasselsstroß zom Einbahnverkehr ömzofunktionere. Sechs jroße Müllkübele wohde so op dem Börjersteisch afjestellt, dat mer nit mih vörbeijonn konnt. Einzwesche mot eene von de Verwaltung äwwer de Tasse em Owerstübsche wedder jradjeröckht han, denn dat Ärjernes wohd an en angere Stell verbannt.

Kooz vör Weihnachte es em Dörp wedder e Licht anjenge. 5 Vereine (natürlisch wore dinn Schötze och dabei) hant doför jesorscht, dat am Denkmol wedder ne Chrisboom stond. Bei nem Fest jof et Jlöhwing, Bier on Wöschkes. För de Boom jof et an jede Eck Anteilscheine zo koofe, för die du hingerher dolle Preise jewenne konns. Ech han natürlisch wedder nix jewonne, äwwer doför moht ech en de Saukält minne Jlöhwing janz rasch drenke, sons hätt ech dä lotsche mösse. Äwwer ech freu mech schon op dies Johr, denn ech han jehöht, et jöft wedder ne Boom. Schöne Jroß



**Dinn Hänschen.**